

DOMINGU I TEMPU ADVENTU – TINAN C

Tema

Iha Domingu dahuluk Tempu Adventu nian, Maromak nia Liafuan aprezena mai ita aprosimasaun dahuluk ba Na'i ne'ebé atu mai.

Iha *leitura dahuluk*, liuhusi profeta Jeremias nia ibun, Maromak aliansa nian haklaken katak nia fiél ba ninia promesa sira no sei haruka ba nia Povu “tubun” ida husi família David nian. Nia misaun maka konkretiza mehi kona-ba mundu ida dame no justisa nian: fekundidade, moris di'ak, moris naresin, maka rezultadu sira husi Mesias nia hahalok sira.

Evanjellu aprezena Jezús mai ita, Mesias David nia oan, haklaken hela ba ema sira ne'ebé sente an nu'udar dadur: “haksolok bá, imi-nia libertasaun besik daudaun ona. Mundu tuan ne'ebé dadur imi atu monu daudaun no, iha nia fatin, sei moris mundu foun ida, iha-ne'ebé imi sei koñese liberdade no moris nakonu. Matan moris bá, atu simu Mane Makso'ik ne'ebé lori mai imi projetu mundu foun ne'e nian”. Presiza rekoñese nia, hatene identifika ninia apelu sira no iha korajen atu harii, hamutuk ho Nia, justisa no dame.

Leitura daruak konvida ita atu keta hela iha mediokridade no komodizmu, maibé hein ho atitude ativa Na'i ne'ebé atu mai. Fundamentál tebes iha atitude ida-ne'e, moris iha domin: nia mak sentru ba ita-nia sasin pesoál, komunitáriu, ekleziál.

LEITURA I – Jer 33,14-16

Ita iha Sedecias (587 mK) nia ukun ba tinan sanulu. Ezérsitu babilóniu Nabucodonosor nian tau serku ba Jerusalém no Jeremias dadur hela iha palásiu liurai nian, tan hetan akuza derrotizmu no traisaun nian (kf. Jer 32,1). Povu lakon esperansa no seguransa hotu. Iha kontestu ida-ne'e mak profeta, hodi Jahwéh nia naran, haklaken tempu foun nia rohan, iha-ne'ebé Maromak sei kura kanek sira, no haraik moris no dame ba Judá (kf. Jer 33,6). Mensajen ne'e halo ema hakfodak basá buat ne'ebé haree mak dalan tak no Jeremias rasik hetan akuza atu profetiza kona-ba inutilidade atu reziste ezérsitu kaldeu sira, destruisaun Jerusalém nian no ezíliu Sedecias nian (kf. Jer 32,3-5).

MENSAJEN

Iha momentu limite nian bainhira buat hotu parese komprometidu, Jeremias haklaken fidelidade Jahwéh nian ba promesa sira halo ba David (kf. 2 Sm 7): iha futuro, Maromak sei halo mosu David nia beioan ida (“zemah zaddîq” – “tubun justu”), ne'ebé sei aseguara dame no salvasaun ba povu tomak. Liafuan “zemah” (“tubun”) fó hanoin kona-ba fekundidade no moris naresin (kf. Is 4,2; Ez 16,7). Ne'e mak naran ne'ebé profeta Zacarias uza atu bolu “Mesias” (kf. Zac 3,8; 6,12).

Liafuan sira liga ho área “justisa” nian hala'o papél fundamentál ida iha anúnsiu Jeremias nian. Nia hateten katak David nia jersaun ne'e mak ema ida “justu” no nia knaar konsiste iha aseguara “justisa” no “direitu” (“mishpat” e “zedaqa”). Kaduak “justisa/direitu”, karakteristikua linguajen profétika, refere ba funksionamentu loos instituisaun responsavel ba administrasaun justisa nian (tribunál) ne'ebé sei halo posivel orden sosiál loos (“zedaqa”), fundamentu dame no prosperidade nian. Liurai Sedecias la garante justisa no la aseguara mós dame; tanba ne'e, katástrofe atu mosu daudaun... Maibé liurai futuro ne'ebé profeta haklaken, husi David nia

jerasaun, mak “Mesias” Maromak nian. Nia misaun mak lori fali “justisa” no lori vida naresin no salvasaun ba Maromak nia Povu. Tan ne’e sei hanaran nia “Na’i mak ita-nia justisa” (“Jahwéh zidqenû”): liuhusi nia, Maromak garante ba nia Povu futuru fekundu ida, justisa nian, moris di’ak nian, salvasaun nian.

Hodi hanoin promesa sira Maromak nian, profeta elimina nostaljia tempu uluk nian, elimina ta’uk ba prezente no hametin rejime ida esperansa nian.

LEITURA II – 1 Tes 3,12–4,2

Komunidade sarani Tessalónica Paulo, Silvano no Timóteo mak funda durante viajem misionária daruak Paulo nian, iha tinan 50 (kf. Act 17,1ss). Durante tempu badak nia pasa iha-ne’ebá, Paulo dezenvolve atividade misionária intensa, ne’ebé rezulta komunidade nho número boot no entuziasta, maioria husi ema jentiu ne’ebé konverte an (kf. 1 Tess 1,9-10). de Paulo nia obra ne’e kolónia judaika hapara ho modu brutál... Paulo tenke halai, husik hela komunidade ida iha perigu laran, ladauk simu katekeze no preparasaun di’ak no lahó kbiit atu moris iha kontestu persegisaun no provokasaun nian. Tanba preokupadu, Paulo haruka Timóteo ba Tessalónica atu hatene notísia sira no fó korajen ba sira-nia fiar. Bainhira Timóteo fila, nia hasoru Paulo iha Corinto no komunika notísia di’ak: Tessalónica oan sira nia fiar, esperansa no domin kontinua moris no sai kle’an liután ho provasaun sira (kf. 1 Tes 1,3; 3,6-8). Paulo bele tau sira nia modelu ba sarani seluk iha rejiaun besibesik (kf. 1 Tes 1,7-8).

MENSAJEN

Maski Maromak harii ona buat hotu iha fiar-na’in sarani sira Tessalónica nia fuan laran, dalan sarani nian seidauk hotu. Presiza halo dalan nafatin (1 Tes 4,1), liuliu buras iha domin ba ema hotu (1 Tes 3,12). Iha atitude ida-ne’e de’it katak, la para atu buras ba beibeik mak bele hein Na’i Jezús Kristu ne’ebé mai (1 Tes 3,13).

EVANJELLU – Lc 21,25-28.34-36

Evanjellu ohin nian ko’alia kona-ba Mane Makso’ik nia fila hikis :ho kbiit boot no glória” (Lc 21,27) no fó konvite atu iha fali esperansa no foti sae ulun tanba “libertasaun besik daudaun ona” (Lc 21,28). Liafuan “libertasaun” (“apolytrôsis” – “resgate/sosa ema dadur nian”) mak liafuan karakteristikas teolojia paulina (1 Cor 1,30; kf. Rom 3,24; 8,23; Col 1,14...), uza atu define rezultadu asaun redentora Jezús nian ba ema sira nia di’ak. Projetu salvasaun/libertasaun umanidade nian, ne’ebé konkretiza iha Jezús nia liafuan no jestu sira, apresenta nu’udar “resgate” umanidade ne’ebé dadur hela iha egoísmu, salan, mate laran. Tanba ne’e, libertasaun husi buat hotu ne’ebé halo ema sai atan no impede nia atu moris iha dignidade Maromak nia oan sira-nian.

Mensajen ne’ebé dixípulu sira propoin klaru liu: imi sei hasoru terus no persegisaun (kf. Lc 21,12-19); maski nune’e, keta monu ba dezesperu basá Jezús mai. Ho nia vinda glorioza (horisehik, ohin, aban), sei remata moris-atan ne’ebé impede eskolante sira atu hatene moris iha plenitude no sei mosu mai mundu foun, ksolok no rahun-di’ak nakonu nian.

“Snál” katastrófiku sira apresenta iha Evanjellu la’ós kuadru “mundu nia rohan nian”; ilas sira-ne’e baibain profeta sira uza atu ko’alia kona-ba “Na’i nia loron”, katak, loron iha-ne’eb’e Jahwéh sei intervein iha istória atu liberta definitivamente Ninia Povu husi moris-atan, hodi hahú eh inaugura tempu ida vida nian, fekundidade nian no dame nian ne’ebé

rohan-laek (kf. Is 13,10; 34,4). Kuadru ne'e la'ós atu hamta'uk, maib'e atu loke fuan sira ba esperansa: bainhira Jez'us mai ho Ninia autoridade soberana, mundu tuan egoízmú no moris-atan nian sei monu no sei mosu mai lora foun salvasaun/libertasaun rohan-laek nian. Evanjellu konvida ba vijilánsia (kf. Lc 21,34-36): presiza mantein atensaun konstante ida, atu preokupasaun sira rai nian no kadeia sira ne'ebé halo sai atan la impede atu dixípulu sira rekoñese no simu Na'i ne'ebé mai.

MENSAJEN

Estrutura Evanjellu ohin ninia fiu kondutór mak referénsia ba Mane Makso'ik nia mamaik "ho kbiit no glória" (Lc 21,27) no konvite atu ba esperansa no foti sa'e ulun basá "libertasaun atu to'o daudaun" (Lc 21,28). Liafuan "libertasaun" ("apolytrôsis" – "selu ema daduur ida nia moris") mak liafuan ida karakterístika teolojia paulina nian (1 Cor 1,30; kf. Rom 3,24; 8,23; Col 1,14...), ne'ebé uza atu define rezultadu Kristu nia hahalok salvasaun nian ba ema sira nia di'ak. Projetu salvasaun/libertasaun umanidade nian, ne'ebé konkretiza iha Jezús nia liafuan no jestu sira, apresenta nu'udar "selu ema dadur" (resgate) tanba egoízmú, salan, mate.

Nune'e, ida-ne'e mak libertasaun husi buat hotu ne'ebé halo ema sai atan ka impede ema sira atu moris ho dignidade Maromak nia oan sira-nian.

Mensajen ne'ebé propoin ba eskolante sira mak: imi sei hetan terus no persegisaun (kf. Lc 21,12-19); biar nune'e, keta husik dezesperu halakon imi-nia kbiit basá Jezús mai. Ho ninia mamaik iha glória (horisehik, ohin, aban), moris atan nia sei hotu no sira sei haree vida naresin no sei mosu mai mundu foun ida nakonu ho ksolok.

Sinal sira katástrofe nian la'ós sinal rai nabeen nian, ka mundu nia rohan; sira mak ilas ne'ebé profeta sira uza atu ko'alia kona-ba "Na'i nia lora", katak lora ne'ebé Jahwéh sei intervein iha istória atu so'i ho modu definitivu nia Povu husi moris atan nian, hodi inaugura tempu ida vida nian, fekundidade no dame rohan-laek nian (kf. Is 13,10; 34,4). Kuadru katástrofe nian la'ós atu hamta'uk, maibé atu loke fuan sira ba esperansa: bainhira Jezús mai ho ninia autoridade aas liu, mundu tuan egoízmú no atan nian sei monu no sei mosu mai lora foun libertasaun/salvasaun ne'ebé la nahas.

Ikus nian, iha mós konvite ba vijilánsia (kf. Lc 21,34-36): presiza mantein atensaun konstante, atu preokupasaun rai nian no kadeia sira ne'ebé halo ema sai atan, la impede atu eskolante sira rekoñese no simu Na'i ne'ebé mai.